

四庫全書薈要

• 乾隆御覽本

集部

欽定四庫全書薈要

集部

王子安集卷五

三至



詳校官助教臣常循

王子安集卷三

唐 王勃 撰

五言律詩

銅雀妓二首



金鳳鄰銅雀漳河望鄴城君王無處所臺榭若平生舞

席紛何就歌梁儼未傾西陵松檟冷誰見綺羅情

妾本深宮妓層城閉九重君王歡愛盡歌舞為誰容錦  
衾不復襞羅衣誰再縫高臺西北望流涕向青松

聖泉宴并序

玄武山有聖泉焉浸淫歷數百千年乘巖泌湧接  
磴分流下瞰長江沙堤石岸咸古人遺跡也茲乃  
青蘋綠芰紫苔蒼蘚遂使江湖思遠寤寐寄託既  
而崇巒左峭石壑前縈丹萼萬尋碧潭千頃松風  
唱響竹露薰空瀟瀟乎人間之難遇也方欲以林  
壑為天屬琴樽為日用嗟乎古今代謝方深川上  
之悲少長同遊且盡山陰之樂盍題芳什共寫高

情詩得泉字

披襟乘石磴，列籍俯春泉。  
蘭氣薰山酌，松聲韻野弦。  
影飄垂葉外，香度落花前。  
興洽林塘晚，重巖起夕煙。

尋道觀

即昌利觀張天師居也

芝廬光分野，蓬闕盛規模。  
碧壇清桂闕，丹洞肅松樞。  
玉笈三山記，金箱五嶽圖。  
蒼虬不可見，一作得空望白雲衢。

散關晨度

關山凌旦開，石路無塵埃。  
白馬高談去，青牛真氣來。  
重

門臨巨壑連棟起崇隈  
即今揚策度非是棄繻回

別薛華

送送多窮路  
遑遑獨問津  
悲涼千里道  
悽斷百年身  
心事同漂泊  
生涯共苦辛  
無論去與住  
俱是夢中人

重別薛華

明月沉珠浦  
秋風濯錦川  
樓臺臨絕岸  
洲渚亘長天  
旅泊成千里  
棲遑共百年  
窮途惟有淚  
還望獨潸然

遊梵宇三覺寺

香閣披青磴，瑤臺控紫岑。  
葉齊山路狹，花積野壇深。  
蘿幌棲禪影，松門聽梵音。  
遽欣陪妙躅，延賞滌煩襟。

麻平晚行

百年懷土望千里，倦遊情高低。  
尋戍道遠近，聽泉聲礧礧。  
葉纔分色，山花不辨名。  
羈心何處盡，風急暮猿清。

送盧主簿

窮途非所恨，虛室自相依。  
城闕居年滿，琴樽俗事稀。  
開襟方未已，分袂忽多違。  
東巖富松竹，歲暮幸同歸。

餞韋兵曹

征驂臨野次別袂慘江垂  
川霽浮煙斂山明落照移  
鷹風凋晚葉蟬露泣

一作泣

秋枝亭臯分遠望延想間雲涯

白下驛餞唐少府

下驛窮交日昌亭旅食年相知  
何用早懷抱即依然浦樓低  
晚照鄉路隔風煙去去如何道  
長安在日邊

杜少府之任蜀州

城闕輔三秦風煙望五津  
與君離別意同是宦遊人海

內存知已天涯若比鄰無為在岐路兒女共霑巾

仲春郊外

東園垂柳徑西堰落花津物色連三月風光絕四鄰  
鳥飛村覺曙魚戲水知春初晴山院裏何處染鶯塵

郊興

空園歌獨酌春日賦閒居澤蘭侵小徑河柳覆長渠  
雨去花光濕風歸月影疎山人不惜醉唯畏綠樽虛

郊園即事

煙霞春旦

一作早

賞松竹故年心斷山疑畫障懸溜寫鳴

琴草徧南亭合花濃

一作開

北院深閒居饒酒賦隨興欲

抽簪

觀佛跡寺

蓮座神容儼松崖聖趾餘年長金跡淺地久石文疎頽  
華臨曲磴傾影赴前除共嗟陵谷遠俄視化城虛

山居晚眺贈王道士

金壇疎俗宇玉洞侶仙羣花枝棲晚露峰葉度晴雲斜

照移山影迴沙擁溜

一作  
櫺

文琴樽方待興竹樹已迎暉

八仙逕

寺南又有昌利觀去寺可  
數里巖逕窈窕杖而後進

柰園欣八正松巖訪九仙  
援蘿窺霧術攀桂俯雲阡

一作

煙代北鸞驂至遼西鶴騎旋終希  
脫塵網連翼下芝田

春日還郊

閒情兼默語

一作  
默默

攜杖赴巖泉草綠縈新帶榆青綴古

錢魚牀侵岸水鳥路入山煙還題平子賦花樹滿春田

對酒春園作

金史四庫全書  
卷三  
投簪下山閣，攜酒對河梁。  
狹水牽長鏡，高花送斷香。  
繁鶯歌似曲，疎蝶舞成行。  
自然催一醉，非但閱年光。

觀內懷仙

玉架殘書隱金壇，舊跡迷牽花尋紫洞。  
一作步葉下清澗

溪瓊漿猶類乳石髓，尚如泥自能成羽翼。  
何必仰雲梯。

秋日別王長史

別路長。  
一作餘千里深恩重百年，正悲西候日更動。  
北梁

篇野色籠寒霧，山光斂暮煙。  
終知難再奉懷德，自潛然。

上巳浮江宴韻得遙字

上巳年光促中川興緒遙  
綠齊山葉滿紅洩岬花銷  
泉聲喧後澗虹影照前橋  
遽悲春望遠江路積波潮

長柳

晨征犯煙磴夕憩在雲關  
晚風清近壑新月照澄灣  
郊童樵唱返津叟釣歌還  
客行無與晤賴此釋愁顏

羈遊餞別

客心懸隴路遊子倦

一作倦

江干擡豐

一作濃

朝砌靜篠窳

夜牕寒琴聲銷別恨風景駐離歡寧竟山川遠悠悠旅  
思難

易陽早發

飭裝侵曉月奔策候殘星危閣尋丹嶂迴梁屬翠屏雲  
間迷樹影霧裏失峰形復此涼颼至空山飛夜螢

焦峴早行和陸四

侵星違旅館乘月戒征儔復嶂迷晴色虛巖辨暗流猿  
吟山漏曉螢散野風秋故人渺何際鄉關雲霧浮

深灣夜宿

主人依山帶江

津途臨巨壑村宇架危岑  
堰絕灘聲隱峰交樹影深  
江童暮理揖山女夜調砧  
此時故鄉遠寧知遊子心

傷裴錄事喪子

蘭堦霜候早松路窈

一作夜

臺深魄散珠胎沒芳銷玉樹

沉露文晞宿草煙照慘平林  
芝焚空歎息流恨滿羸金



五言排律

泥谿

弭棹凌奔壑，低鞭躡峻岐。  
江濤出岝嶺，險峰磴入雲。  
危溜急，船文亂。巖斜騎影移。  
水煙籠翠渚，山照落丹崖。  
風生蘋浦葉，露泣一作泣竹潭枝。  
泛水雖云美，勞歌誰復知。

秋日仙遊觀贈道士

一作駱賓王詩無首四句

石圖分帝宇，銀牒洞靈宮。  
迴丹紫岫室，複翠上巖櫳。  
霧濃金竈靜，雲暗玉壇空。  
野花常捧露，山葉自吟風。  
林泉

明月在詩酒故人同待余逢石髓從爾命飛鴻

出境遊山二首

源水終無路山阿若有人驅羊先動石走兔欲投巾  
洞晚秋泉冷巖朝古樹新峰斜連鳥翅磴疊上魚鱗  
化鶴千齡早元龜六代春浮雲今可駕滄海自成塵

振翮凌霜吹正月佇天潯回鑣凌翠壑飛軫控青岑  
巖深靈竈沒澗毀石渠沈宮闕雲間近江山物外臨  
玉壇棲暮夜珠洞結秋陰蕭蕭離俗影擾擾望鄉心  
誰意山

遊好屢傷人事侵

三月曲水宴得煙字

彭澤官初去，河陽賦始傳。  
田園歸舊國，詩酒間長筵。  
列室窺丹洞，分樓瞰紫煙。  
縈迴亘津渡，出沒控郊鄆。  
鳳琴調上客，龍轡儼羣仙。  
松石偏宜古，藤蘿不記年。  
重簷交密樹，複磴擁危泉。  
抗石晞南嶺，乘沙眇北川。  
傳巖來築處，磻溪入釣前。  
日斜真趣遠，幽思夢涼蟬。

盧照隣和得搏字附

風煙彭澤里山水仲長園繇來棄銅墨本自重琴樽  
高情邈不嗣雅道今復存有美光時彥養德坐山樊  
門開芳杜徑室距桃花源公子黃金勒仙人紫氣軒  
長懷去城市高詠狎蘭蓀連沙飛白鷺孤嶼嘯玄猿  
日影巖前落雲花江上翻興闌車馬散林塘夕鳥喧

五言絕句

晚屆鳳州

寶雞辭舊域仙鳳歷遺墟去此近城闕青山明月初

羈春

客心千里倦春事一朝歸還傷北園裏重見落花飛

林塘懷友

芳屏畫草仙杼織朝霞何如山水路對面即飛花

山扉夜坐

抱琴開野室，攜酒對情人。  
林塘花月下，別是一家春。

春莊

山中蘭葉徑，城外李桃園。  
豈知人事靜，不覺鳥聲喧。

春遊

客念紛無極，春淚倍成行。  
今朝花樹下，不覺戀年光。

春園

山泉兩處晚，花柳一園春。  
還持千日醉，共作百年人。

林泉獨飲

丘壑經塗賞花柳遇時春相逢今不醉物色自輕人

登城春望

物外山川近晴初景靄新芳郊花柳徧何處不宜春

他鄉敘興

綴葉歸煙晚乘花落照春邊城琴酒處俱是越鄉人

夜興

野煙含夕渚山月照秋林還將中散興來偶步兵琴

臨江二首

泛泛東流水飛飛北上塵歸驂將別棹俱是倦遊人  
去驂嘶別路歸棹隱寒洲江皋木葉下應想故城秋  
江亭夜月送別二首

江送巴南水山橫塞北雲津亭秋月夜誰見泣離羣  
亂煙籠碧砌飛月向南端寂寂離亭掩江山此夜寒  
別人四首

久客逢餘閏他鄉別故人自然堪下淚誰思望征塵  
江上風煙積山幽雲霧多送君南浦外還望將如何

桂軺初不駐蘭筵  
幸未開林塘風月賞  
應待故人來  
霜華淨天末霧色籠江際  
客子常畏人何為久留滯  
贈李十四四首

野客思茅宇山人愛竹林  
琴尊惟待處風月自相尋  
小徑偏宜草空庭不厭花  
平生詩與酒自得會仙家  
亂竹開三徑飛花滿四鄰  
從來揚子宅別有尚玄人  
風筵調桂軺月徑引藤杯  
直當花院裏書齋望曉開

早春野望

江曠春潮白山長曉岫青他鄉臨眺

一作  
晚

極花柳映邊

亭

山中

長江悲已滯萬里念將歸况屬高風晚山山黃葉飛

冬郊行望

桂密巖花白梨疎林葉紅江臯寒望盡歸念斷征蓬

寒夜思友三首

久別侵懷抱他鄉變容色月下調鳴琴相思此何極

雲間征思斷月下歸愁切鴻雁西南飛如何故人別  
朝朝翠山下夜夜蒼江曲復此遙相思清尊湛芳綠  
始平晚息

觀闕長安近江山蜀道賒客行朝復夕無處是鄉家  
扶風晝屈離京浸遠

帝里金莖去扶風石柱來山川殊未已行路方悠哉  
普安建陰題壁

江漢深無極梁岷不可攀山川雲霧裏遊子幾時還

九日

九日重陽節開門有菊花不知來送酒若箇是陶家

七言絕句

秋江送別二首

早是他鄉值早秋，江亭明月帶江流。  
已覺逝川傷別念，復看津樹隱離舟。

歸舟歸騎儼成行，江南江北互相望。  
誰謂波瀾纔一水，已覺山川是兩鄉。

蜀中九日登玄武山旅眺

紀事玄武山在東蜀勃以檄難文斥出  
沛王府既廢客劍南王有游玄武山詩

九月九日望鄉臺他席他鄉送客杯人今一作情已厭南  
中苦鴻鴈那從北地來

盧照鄰九月九日玄武山旅眺附

九月九日眺山川歸心歸望積風煙他鄉共酌金花  
酒萬里同悲鴻鴈天

邵大震九月九日登玄武山旅眺附

九月九日望遙空秋水秋天生夕風寒鴈一向南飛  
遠遊人幾度菊花叢

河陽橋代竇郎中佳人答揚中舍

披風聽鳥長河路  
臨津織女遙相妬  
判知秋夕帶啼還  
那及春朝携手度

王子安集卷三

王子安集卷四

唐 王勃 撰

序

續書序

序曰書以記言其來尚矣越在三代左史職之百官以理萬人以示揚于王庭用實大焉苟非可以變理情性平章邦國於彝倫而敘要道察時變而經王猷樹皇極之綱維資生靈之視聽皆可略也昔者仲尼之述書也

將以究事業之通而正性命之理故曰吾欲托之空言  
不如附之行事道德仁義於是乎明刑政禮樂於是乎  
出非先王之德行不敢傳非先王之法言不敢道紀千  
數百歲斷自唐虞迄于周風流所存百篇而已以此見  
聖人言約理舉神明不勞而體時務之撰矣故能法象  
天地同符易簡借前箸於筌蹄驅後王於軌物密而顯  
宏而奧久而彌新用而不竭非古之聰明聖智玄覽博  
達孰能為此哉孔安國曰帝王之制坦然明白可舉而

行嗟乎其言甚大可使南面稱聖人之後矣自時以降  
史述陵遲人自為家標指失中陳事亂而無當制理參  
而不一繇是大典散而人文乖是非繁而取舍謬與夫  
古先哲人制述之意不其踈乎我先君文中子實秉睿  
懿生於隋末覩後作之違方憂異端之害正乃喟然曰  
宣尼既沒文不在茲乎遂約大義刪舊章續書為三百  
六十篇考偽亂而修元經正禮樂以旌後王之失述易  
讚以申先師之旨經始漢魏迄于有晉擇其典物宜於

教者續書為百二十篇而廣大悉備嗟乎賢聖之述豈  
多為哉噫亦足垂訓作則冒天下之道如斯而已矣當  
時門人百千數董薛之徒並受其義遭代喪亂未行于  
時歷年永久稍見殘缺貞觀中大原府君考諸六經之  
目則亡其小序其有錄而無篇者又十六焉嗚呼茲不  
可復見矣家君欽若丕烈圖終休緒乃例六經次禮樂  
叙中說明易讚永惟保守前訓大克敷遺後人勅兄弟  
五六冠者童子六七祗祗怡怡講問伏漸之日久矣躬

奉成訓家傳異聞猶恐不得門而入才之不逮至遠也  
是用厲精激憤宵吟晝詠庶幾乎學而知之者其修身  
慎行恐辱先也豈聲祿是徇前人之不繼是懼間者承  
命為百二十篇作序而兼當補修其闕爰考衆籍共參  
奧旨泉源浩然罔識攸濟嗚呼小子何敢以當之也其  
盡心力乎始自總章二年洎乎咸亨五年刊寫文就定  
成百二十篇勒成二十五卷昔者文中子曰漢魏之禮  
樂未足稱其書不可廢也尚有近古之對議存焉制詔

冊則幾乎典誥矣後之達悟者將有得於斯文乎于時  
龍集閣茂勉踵前修在大唐御天下之五十七祀也

黃帝八十一難經序

黃帝八十一難經是醫經之秘錄也昔者岐伯以授黃  
帝黃帝歷九師以授伊尹伊尹以授湯湯歷六師以授  
太公太公授文王文王歷九師以授醫和醫和歷六師  
以授秦越人秦越人始定立章句歷九師以授華陀華  
陀歷六師以授黃公黃公以授曹夫子夫子諱元字真  
道自云京兆人也蓋受黃公之術洞明醫道至能遙望  
氣色徹視腑臟洗腸剝胸之術往往行焉浮沉人間莫

有知者勃養於慈父之手每承過庭之訓曰人子不知醫古人以為不孝因竊求良師陰訪其道以大唐龍朔元年歲次庚申冬至後甲子子遇夫子於長安撫勃曰無欲也勃再拜稽首遂歸心焉雖父伯兄弟不能知也蓋授周易章句及黃帝素問難經乃知三才六甲之事明堂玉匱之數十五月而畢將別謂勃曰陰陽之道不可妄宣也針石之道不可妄傳也無猖狂以自彰當陰沉以自深也勃受命伏習五年于茲矣有升堂觀奧之

心焉近復鑽仰太虛導引元氣覺滓穢都絕精明相保  
方欲坐守神仙棄置流俗噫蒼生可以救耶斯文可以  
存耶昔太上有立德其次有立功其次有立言非以徇  
名也將以濟人也謹錄師訓編附聖經庶將來君子有  
以得其用心也



四分律宗記序

昔在調御利見迦維光宅淨都撫臨法界抑揚垢路之  
業以疆理情田闡導毗尼之藏以隄防性海二邊雲徹  
方知實相之尊十刹風行乃識真如之貴將使龍象緇  
服維明克允鶩鶩玄明有恥且格五篇垂範豈同訓夏  
之科七聚分宗寧比歌虞之制功存離欲道在降魔仙  
苑創基因善果以調物提河滅跡憑淨戒以為師誠拯  
溺之舟航而禦點之銜策者矣故能莊嚴百福粉繪三

身摧憍慢山拔生死樹覆篋菩薩之道濫觴正覺之源  
除惑箭而斷愛枝銷恚刀而解疑網自銀棺掩耀金杖  
殊珍五師煙騰四分雲謠波離睿旨明而更明飲光妙  
跡盛而愈盛其後卑摩覃思猶沉赤水之輝惠遠研精  
尚玷玄巖之彩遂使瓊編浩汗利涉迷於要津瑤軸紛  
綸登高暗於飛陞熟習者博而寡用志學者勞而少功  
七衆所以遲迴八部繇其太息丕應冥發睿感潛融爰  
挺異才式扶象訓有西京太原寺索律師俗姓范氏其

先南陽人也殷霸洪胤周藩茂族八鸞與四牡競馳紫  
繪與青螭疊照六軍卿胄績著於鍾鼎三傳儒門業流  
於訓詁律師冲襟霞映峻局霜淒筠抱顯於髫齡蘭芬  
凝於卣齒繇是糠粃禮樂錙銖名教以堯舜為塵勞以  
周孔為桎梏爰依白法遂托玄徒探鷲嶺之微言得龍  
宮之秘藏咸亨之祀椒房諒陰捨槐里而構菴園因金  
穴而開銀地伽藍肇建號曰太原明陽所及咸收時望  
自非價隆康會譽重摩騰竺法猷之苦節支道林之遠致

將何以發明禪宇光應綸言律師乃以道衆羽儀釋門  
棟幹粵自弘濟來遊太原經行德人於斯為盛既而懼  
六和之紊緒悼三聚之乖宗稽法令之遺文討惠猷之  
舊業網羅近護吞含覺明原始要終探賾索隱芟夷疣  
贅剪截駢枝收絕代之精微詰往聖之紕繆葭灰屢變  
槐燧驟遷聞遮持犯之異同廢立止作之輕重故以該  
象牙之扇窮貝葉之圖鑽研刊削五載而就名曰開四  
分律宗記凡十卷三十七萬六百三十言律師又以為

仲尼述易申妙典於繫辭元凱談經託餘文於釋例爰  
因多暇更輯舊章牢籠秘密之宗發揮沉鬱之旨名曰  
開四分律宗拾遺鈔凡十卷四十萬餘言所以裨助三  
明抑揚四謗弘八正之道成一家之言庶使衆善雷奔  
羣疑霧斂照歡戚之兩鏡蕩欣憂之二瓶憑此戒田方  
躋定境豈直功周沙甸道制鐵圍而已哉弟子才非玄  
度識劣真長本乏凌雲之詞虛荷彌天之眷揄揚盛烈  
顧孫綽而多慚歸依勝侶仰郝惜而自勗輒牽庸陋輕

序德音豈比夫公理昌言資繆襲之引太冲作賦假士  
安之談蓋所謂觀博而識班聞樂而竊抃者矣故曰四  
分律宗記序

入蜀紀行詩序

總章二年五月癸卯余自長安觀景物于蜀遂出褒斜之隘道抵岷峨之絕徑超玄谿歷翠阜迨彌月而臻焉若乃採江山之俊勢觀天地之奇作丹壑爭流青峰雜起陵濤鼓怒以伏注天壁嵯峨而橫立亦宇宙之絕觀者也雖莊周詫呂梁之險韓侯怯孟門之峻曾何足云蓋登培塿者起衡霍之心游涓澮者發江湖之思況乎躬覽勝事足踐靈區煙霞為朝夕之資風月得林泉之

助嗟乎山川之感召多矣余能無情哉爰成文律用宣  
行唱編為三十首投諸好事焉

三月上巳祓禊序

觀夫天下四方以宇宙為城池人生百年用林泉為窟  
宅雖朝野殊致出處異途莫不擁冠蓋於煙霞披薜蘿  
於山水況乎山陰舊地王逸少之池亭永興新交許玄  
度之風月琴臺寥落猶停隱遯之賓釀渚荒涼尚遏逢  
迎之客仙舟溶滴若海上之槎來羽蓋參差似遼東之  
鶴舉或昂騏驎或泛飛鳧俱安名利之場各得逍遙之  
地而上屬無為之道下棲玄邈之風永淳二年暮春三

月遲遲風景出沒媚於郊原片片仙雲遠近生於林薄  
雜花爭發非止桃蹊羣鳥亂飛有踰鸚谷王孫春草處  
處爭鮮仲阮芳園家家並翠於是攜旨酒列芳筵先被  
襖於長洲却申交於促席良談吐玉長江與斜漢爭流  
清歌遶梁白雲將紅塵並落他鄉易感增悽愴於茲辰  
羈客何情更歡娛於此日加以今之視昔已非昔日之  
歡後之視今亦是今時之會人之情也能不應乎且題  
姓氏以表襟懷使夫會稽竹箭則推我於東南崑阜琳

琅亦歸予於西北



# 守歲序

歲月易盡光陰難駐春秋冬夏錯四序之涼炎甲乙丙  
丁紀三朝之歷數十二月之陰氣玉律窮年一萬歲之  
休禎金觴獻壽賁鼓雷動煙火星流偃子黃童統鈎陳  
而驅赤疫諸王等集陳玉帛而朝諸侯京兆天中竦樓  
臺而徹漢長安路上亂車馬而飛塵王丞相之登臨行  
將在目戴侍中之重席忽爾明朝槐火滅而寒氣消蘆  
灰用而春風起魚鱗布葉爛五色而翻光鳳腦吐花燦

百枝而引照悲夫年華將晚志事寥落公孫弘之甲第  
天子未知王仲宣之文章公卿不識對他鄉之風景憶  
故里之琴歌柏葉為銘影泛新年之酒椒花入頌先開  
獻歲之詞作者七人同為六韻

# 山亭興序

仁者樂山智者樂水深山大澤龍蛇為得性之場廣漢  
巨川珠貝是有殊之地豈徒茂林修竹王右軍山陰之  
蘭亭流水長堤石季倫河陽之梓澤下官天性任真直  
言淳朴拙容陋質眇少之丈夫蹇步窮途坎壈之君子  
文史足用不讀非道之書氣調不羈未被可人之目頴  
川人物有荀家兄弟之風漢代英奇守陳氏門宗之德  
樂天知命一十九年負笈從師二千餘里有弘農公者

日下無雙風流第一仁崖智宇照臨明日月之輝廣度  
冲襟磊落壓乾坤之氣王夷甫之瑤林瓊樹直出風塵  
嵇叔夜之龍章鳳姿混同人野雄談逸辯吐滿腹之精  
神達學奇才抱填胸之文籍簪裾見屈輕脫履於西陽  
山水來遊重橫琴於南澗百年奇表開壯志於高明千  
里心期得神交於下走山人對興即是桃花之源隱士  
相逢不異菖蒲之澗黃精野饌赤石神脂玉案金盤徵  
石髓於蛟龍之窟山樽野酌求玉液於蓬萊之峰溪橫

燕尾巖豎龍頭鍛野老之真珠掛幽人之明鏡山腰半  
折溜王烈之香膏洞口橫開滴嚴遵之芳乳藤牽赤絮  
南方之物產可知粉漬青田外域之謠風在即人高調  
遠地爽氣清抱玉策而登高出瓊林而更遠漢家二百  
所之都郭宮殿平看秦樹四十郡之封畿山河坐見班  
孟堅騁兩京雄筆以為天地之奧區張平子奮一代宏  
才以為帝王之神麗珠城隱隱闌干象北斗之宮清渭  
澄澄滉漾即天河之水長松茂柏鑽宇宙而頓風雲大

壑橫溪吐江河而懸日月鳳凰神岳起煙霧而當軒鸚鵡春泉雜風花而滿谷望平原蔭藂薄山情放曠即滄浪之水清野氣蕭條即崆峒之人智搖頭坐唱頓足起舞風塵灑落直上天池九萬里丘墟雄壯傍吞少華五千仞裁二儀為輿蓋倚八荒為戶牖榮者吾不知其榮美者吾不知其美下官以詞峰直上振筆札而前驅高明以翰苑橫開列文章於後殿情興未已即令樽中酒空彩筆未窮須使山中兔盡

山亭思友人序

高興之後中宵起觀舉目四望風寒月清鄰人張氏有  
山亭焉洞壑橫分奇峰直上鬱然有造化之功矣嗟乎  
大丈夫荷帝王之雨露對清平之日月文章可以經緯  
天地器局可以畜洩江河七星可以氣衝八風可以調  
合獨行萬里覺天地之崆峒高枕百年見生靈之醴醕  
雖俗人不識下士徒輕顧視天下亦可以蔽寰中之一  
半矣惜乎此山有月此地無人清風入琴黃雲對酒雖

形骸真性得禮樂於身中而宇宙神交卷煙霞於物表  
至若開闢翰苑掃蕩文場得宮商之正律受山川之傑  
氣雖陸平原曹子建足可以車載斗量謝靈運潘安仁  
足可以膝行肘步思飛情逸風雲坐宅於筆端興洽神  
清日月自安於調下云爾

王子安集卷四

王子安集卷五

唐 王勃 撰

序

滕王閣詩序

豫章故郡洪都新府星分翼軫地接衡廬襟三江而帶  
五湖控蠻荆而引甌越物華天寶龍光射牛斗之墟人  
傑地靈徐孺下陳蕃之榻雄州霧列俊彩星馳臺隍枕  
夷夏之交賓主盡東南之美都督閻公之雅望榮戟遙

臨宇文新州之懿範，瞻帷暫駐，十旬休暇，勝友如雲，千里逢迎，高朋滿座。騰蛟起鳳，孟學士之詞宗；紫電清霜，王將軍之武庫。家君作宰，路出名區；童子何知，躬逢勝饌。時維九月，序屬三秋；潦水盡而寒潭清，煙光凝而暮山紫。儼驂馱於上路，訪風景於崇阿；臨帝子之長洲，得仙人之舊館。層臺聳翠，上出重霄；飛閣流丹，下臨無地。鶴汀鳬渚，窮島嶼之縈迴；桂殿蘭宮，列岡巒之體勢。披繡闥，俯雕甍，山原曠其盈視，川澤紆其駭矚。閭閻撲地，

鐘鳴鼎食之家舸艦彌津青雀黃龍之舳舻銷雨霽彩  
徹區明落霞與孤鶩齊飛秋水共長天一色漁舟唱晚  
響窮彭蠡之濱鴈陣驚寒聲斷衡陽之浦遙襟俯暢逸  
興遄飛爽籟發而清風生纖歌凝而白雲遏睢園綠竹  
氣凌彭澤之樽鄴水朱華光照臨川之筆四美具二難  
并窮睇眄於中天極娛遊於暇日天高地迴覺宇宙之  
無窮興盡悲來識盈虛之有數望長安於日下指吳會  
於雲間地勢極而南溟深天柱高而北辰遠關山難越

誰悲失路之人萍水相逢盡是他鄉之客懷帝闈而不  
見奉宣室以何年嗟乎時運不齊命途多舛馮唐易老  
李廣難封屈賈誼於長沙非無聖主竄梁鴻於海曲豈  
乏明時所賴君子安貧達人知命老當益壯寧移白首  
之心窮且益堅不墜青雲之志酌貪泉而覺爽處涸轍  
以猶歡北海雖賒扶搖可接東隅已逝桑榆非晚孟嘗  
高潔空餘報國之情阮籍猖狂豈效窮途之哭勃三尺  
微命一介書生無路請纓等終軍之弱冠有懷投筆慕

宗慤之長風舍簪笏於百齡奉晨昏於萬里非謝家之  
寶樹接孟氏之芳鄰他日趨庭叨陪鯉對今晨捧袂喜  
託龍門楊意不逢撫凌雲而自惜鍾期既遇奏流水以  
何慚嗚呼勝地不常盛筵難再蘭亭已矣梓澤丘墟臨  
別贈言幸承恩於偉饒登高作賦是所望於羣公敢竭  
鄙誠恭䟽短引一言均賦四韻俱成請灑潘江各傾陸  
海云爾



遊山廟序

吾之有生二十載矣雅厭城闕酷嗜江海常學仙經博涉道記知軒冕可以理隔鸞鳳可以術待而事親多衣食之虞登朝有聲利之迫清識滯於煩城仙骨摧於俗境嗚呼阮籍意疎嵇康體放有自來矣常恐運促風火身非金石遂令林壑交喪煙霞版蕩此僕所以懷泉塗而惴恐臨山河而歎息者也粵以勝友良暇相與遊於玄武西山廟蓋蜀郡三靈峰也山東有道君廟古者相

傳以名焉爾其丹壑叢倚玄崖糾合俯臨萬仞平視重  
玄乘杳冥之絕境屬芬華之暮節玉房跨霄而懸居瓊  
臺出雲而高峙亦有野獸羣狎山鷲互嚙崇松將巨栢  
爭陰積瀨與幽湍合響眇眇焉迢迢焉王孫何以不歸  
羽人何以長往其玄都紫微之事耶方斂手鐘鼎息肩  
巖石絕視聽於寰中置形骸於度外不其然乎時預乎  
斯者濟陰鹿弘脩安陽邵令遠耳盡詩以言志不以韻  
數裁焉

梓潼南江泛舟序

咸亨二年六月癸巳梓潼縣令韋君以清湛幽凝鎮流  
靖俗境內無事艤舟於江潭縱觀於丘壑渺然有山林  
陂澤之思遂長懷悠想周覽極睇思其人則呂望藉茅  
於磻溪之陰屈平製芰於涪陽之浦覺瀛洲方丈森然  
在目於是間以投壺讎以妙論亦有嘉餽旨酒鳴絃朗  
笛以補尋幽之致焉預於斯者若干人爾



上巳浮江宴序

吾之生也有極時之過也多緒若夫遭主后之明聖屬  
天地之貞觀得畎畝之相保以農桑為業而託形宇宙  
者幸矣况乃偃泊山水遨遊風月樽酒於其外文墨於  
其間則造化之於我得矣太平之縱我多矣茲以上巳  
芳節雲開勝地大江浩曠羣卉紛糾出重城而振策下  
長浦而方舟林壑清其顧盼風雲蕩其懷抱于時序躔  
青律運啟朱明輕羨秀而郊成青落花盡而亭臯晚丹

鷺紫蝶候芳畧而騰姿早驚歸鴻俟迅風而弄影熾暄  
蕙密野淑蘭滋弱荷抽紫疎萍泛綠于是儼松舲於石  
嶼停桂檝於璇潭指林岬而長懷出河洲而極睇妍妝  
袿服香驚北渚之風翠幙玄帷彩綴南津之霧若乃尋  
曲渚歷迴溪榜謳齊引漁歌互起飛沙濺石湍流百勢  
翠嶮丹崖岡巒萬色亦有銀鈎犯浪掛頰翼於文竿瓊  
舸乘波耀錦鱗於畫網鍾期在聽玄雲白雪之琴阮籍  
同歸紫桂蒼梧之醴既而遊盤興遠景促時淹野日照

晴山煙送晚方披襟朗詠餞斜光於碧岫之前散髮高  
吟對明月於青溪之下客懷既暢遊思遄征視泉石而  
如歸佇雲霞而有自昔周川故事初傳曲路之悲江甸  
名流始命山陰之筆盍遵清轍共抒幽襟俾後之視今  
亦猶今之視昔一言均賦六韻齊疏誰知後來者難輒  
以先成為次



綿州北亭羣公宴序

下官人間獨傲海內少徒志不屈於王侯身不絕於塵  
俗孤吟五嶽長嘯三山昔往東吳已有梁鴻之志今來  
西蜀非無張載之懷況乎踐名場攜勝友風月無幾琴  
酒俄垂半面十年一別千里何少府故人攀桂撫金石  
而論心韓法曹新識班荆臨江湖而執手離亭北望煙  
霞生故國之悲別館南開風雨積他鄉之思于時蒼雲  
寡色白日無光沙塵起而桂浦昏鳬鴈下而蘆洲晚傍

隣蒼野霜封橘柚之園斜枕碧潭鴈斷芙蓉之水既而  
登臨惜別驂駕少留季札何人親逢贈縞子荆不敏思  
掛傾城惆悵北梁揖琴臺而漸間徘徊東道思錦署以  
行遙嗟乎人事乖矣江山遠矣請命離前之筆為題別  
後之資五際飛文想羣公之不讓一言畱贈知下筆之  
有神

夏日登龍門樓寓望序

夫益者三友則道術可存同心三人則金蘭可浴况乎  
詩書舊好披樂廣之高天鄉黨新知掃顏回之陋巷尋  
勝地敘清蕪脫野客之荷衣入幽人之桂坐榴花浮酌  
對文舉而無憂葛蔓調絃撫鍾期而有遇既而南方夏  
晚北牖晴開中園之弱柳含煙曠野之陰雲蔽日低虹  
飲水向溪谷而全斜戲鳥凌空狎林亭而半度興含情  
逸共敦行役之期搦管含毫獨對當仁之序



秋日遊蓮池序

人間齷齪抱風雲者幾人庶俗紛紜得英奇者何有煙霞召我相望道術之門文酒起予放浪沉潛之地少畱逸客塞鴈飛鳴北斗橫而天地秋西金用而風露降幽居少事野性多閒登石岬而鋪筵坐沙塲而列席琳瑯觸目朗月清風之後人珠玉在傍鸞鳳虬龍之君子汀洲地遠波濤濺日月之輝人野路殊原隰擁神仙之氣平郊樹直曲浦蓮肥隱士泥清仙人水綠越林亭而極

望生死都捐出宇宙以長懷心靈若喪悲夫秋者愁也  
酌濁酒以蕩幽襟志之所之用清文而銷積恨我之懷  
矣能無情乎

越州秋日宴山亭序

昔王子敬瑯琊之名士常懷習氏之園阮嗣宗陳畱之  
俊人直至山陽之坐豈非琴樽遠契必兆朕於佳辰風  
月高情每畱連於勝地是以東山可望林泉生謝客之  
文南國多才江山助屈平之氣况乎揚子雲之故地巖  
壑依然宓子賤之芳猷絃歌在屬紅蘭翠菊俯映砂亭  
黛柏蒼松深環玉砌參差夕樹煙侵橘柚之園的歷秋  
荷月照芙蓉之水既而星迴漢轉露下風高銀燭擣花

瑤觴抒興一時仙馭方深擯俗之懷五際飛文時動緣  
情之作人分一字四韻成篇

秋日宴洛陽序

夫以東京勝地南呂高秋三塗鎮而九派分白露下而  
清風肅或出或處人多朝野之歡以嬉以遊時極登臨  
之所征衣流寓切下走之蓬襟解榻邀期屬上賓之桂  
席於是齊道實歎琴樽侑儻論心畱連促膝但有潘楊  
之密戚得無管鮑之深知簪組盛而車馬喧庭宇虛而  
管絃亮近臨銅陌斜控銀墟菊照新花泛輕香於遠次  
荷凋晚葉翻翠影於長波聽矚方窮獻酬逾洽年忘小

大傲天地於平生志混榮枯得林泉之意氣願長繩以  
繫日幾近光陰思短札以凌雲或陳歌咏人採古韻成  
者先呈

王子安集卷五

謹案卷三第二頁前五行碧壇清桂闕刊本桂訛  
柱據全唐詩改

第四頁後五行松崖聖趾餘刊本趾作跡據全唐  
詩改

卷四第一頁後四行迄于周刊本周字下衍一漢  
字今刪

第十二頁前四行偃子黃童刊本偃訛偃今改  
第十五頁前七行亦可以蔽寰中之一半矣句疑

有脫誤

卷五第一頁前五行豫章故郡刊本作南昌故郡  
考五代史南唐遷都洪州升洪州為南昌前此  
未有以南昌名郡者今據文苑英華改

第一頁後六行層臺聳翠刊本臺作巒據文苑英  
華改

第二頁前一行青雀黃龍之舳刊本舳訛軸今改



總校官庶吉士臣侍朝

校對官編修臣沈清藻

膳錄監生臣蕭準

欽定四庫全書

集部

王子安集卷八

六至



詳校官助教臣常循

王子安集卷六

唐 王勃 撰

序

晚秋遊武擔山寺序

陳王  
武丘仙鎮吳王殉歿之墟驪嶠崇基秦帝升遐之  
宅雖珠衣玉匣下賁窮泉而廣岫長林終成勝境亦有  
霍將軍之大隧迴寫祁連樗里子之孤墳竟開長樂豈  
如武擔靈嶽開明故地蜀夫人之葬迹任文公之死所

岡巒隱隱化為闔岨之峰松柏蒼蒼即入祇園之樹引  
星垣於沓嶂下布金沙棲日觀於長崖傍臨石鏡瑤臺  
玉甃尚控霞宮寶刹香壇猶芬仙闕琤櫳接映臺凝夢  
渚之雲壁題相輝殿寫長門之月美人虹影下綴虬幡  
少女風吟遙喧鳳鐸羣公以玉律豐暇僚林壑而延情  
錦署多閒想巖泉而結興於是披桂幌歷松扉梵筵霞  
屬禪局煙敞雞林俊賞蕭蕭鷺嶺之居鹿苑高談疊疊  
龍宮之倡于時金方啟序玉律驚秋朔風四面寒雲千

里層軒迴霧齊萬物於三休綺席乘雲窮九垓於一息  
碧鷄靈宇山川極望石兕長江汀洲在目龍鑣翠輶駢  
闐上路之遊列榭崇闈磊落名都之氣渺渺焉洋洋焉  
信三蜀之奇觀也昔者升高能賦勝事仍存登嶽長謡  
清標未遠敢攀盛烈下揆幽襟庶旌西土之遊遠嗣東  
平之唱云爾



宇文德陽宅秋夜山亭宴序

若夫龍津宴喜地切登仙鳳閣玄虛門稱好事亦有登山臨水長想巨源清風明月每思玄度未有能星馳一介留美跡於芳亭雲委八行抒勞思於彩筆遂令啟瑤緘者攀勝集而長懷披瓊翰者仰高筵而不暇王子猷之獨興不覺浮舟嵇叔夜之相知欣然命駕琴樽佳賞始詣臨邛口腹良遊未辭安邑乃知兩鄉投分林泉可攘袂而遊千里同心煙霞可傳檄而定友人河南宇文

嶠清虛君子中山郎餘令風流名士或三秋意契闢林  
院而開襟或一面新交叙風雲而倒屣彭澤陶潛之菊  
影泛仙樽河陽潘岳之花光縣妙理巖巖思壁家藏虹  
岫之珍森森言河各控驪泉之寶偶同金碧顰照詞場  
已漢英靈潛光翰院疊疊焉蕭蕭焉信天下之奇託也  
于時白藏開序青女御律金風高而林野動玉露下而  
江山清琴亭酒榭磊落乘煙竹徑松扉參差向月魚鱗  
積磴還昇蘭桂之峰鴛翼分橋即映芙蓉之水亦有紅

蘋綠荇亘渚連翹玉帶瑤華分楹間植池簾夕散香牽  
十步之風岫幌宵褰氣襲三危之露縱冲襟於俗表留  
逸契於人間東山之賞在焉南澗之情不遠夫以中牟  
馴雉猶嬰觸網之悲單父歌魚罕繼鳴琴之趣俾夫一  
同詩酒不撓於牽絲千載巖溪無慚於景燭云爾



遊冀州韓家園序

銅溝水北石鼓山東星辰當畢昴之墟風俗是唐虞之  
國雖接燕分晉稱天子之舊都而向街當衢有高人之  
甲第祥風塞戶瑞氣沖庭芳酒滿而綠水春朗月閒而  
素琴薦家童掃地蕭條仲舉之園長者盈門廓落東平  
之室梧桐生霧楊柳搖風眺望而林泉有餘奔走而煙  
霞足用神龍起伏俱調鼎鑊之滋鳴鳳雌雄並入笙竽  
之奏高情壯思有抑揚天地之心雄筆奇才有鼓怒風

雲之氣南庭興晚東徑陰生石髓拆而隱士歸玉山崩  
而野人醉僉為文在我卜翰苑當仁王羲之之蘭亭五  
百餘年直至今人之賞石季倫之梓澤二十四友始得  
吾徒之遊陶陶然落落然則大唐調露之元年獻歲正  
月也

夏日宴張二林亭序

張二官松駕乘閒桂筵追賞引簪裾之勝侶狎丘壑之  
神交辨縱於解頤道深於喻指香杯濁醴是河朔之平  
生雄筆清詞得高陽之意氣林亭曠望李倫調妓之園  
泉石周游子晉登仙之浦舟浮葉影簾積花文黃雀度  
而颺驚丹鳥傾而日晚出處之情一致筌蹄之義兩忘  
沈轄畱驥眺乘羊於衛玉揮毫可作明擲地於孫金共  
題橫吹之篇用記茲辰之樂人採一字四韻成篇



夏日宴宋五官宅觀畫障序

宋五官芝庭襲譽盛文史於三冬桂幄凝懽照綺羅於  
九夏樽浮綠蟻每披仙霧之文障列青牛更寫行雲之  
態爾其龍編繡質寶錦分花隱映樓臺比牕簾之在旦  
參差花葉若桃李之恒春楚媛調絃韓娥對酒虹橋度  
幔鵲鏡臨粧佩引琅玕詎動懷風之韻鞍迴玳瑁惟奔  
逐日之姿魚鳥冷而相親泉石紛而在翫宋家斯近雖  
別謝於登垣秦氏未遙自堪留於駐馬驚鴻擅美丹青

貴近質之奇吐鳳標華宮徵得緣情之趣遞揚筆妙式  
暢辭端

秋日宴李處士宅序

若人爭名於朝廷者則冠蓋相趨遯迹於丘園者則林泉見託雖語默非一物我不同而逍遙皆得性之場動息匪自然之地故有李處士者遠辭濠上來遊境中披白雲以開筵俯青溪而命酌昔時西北則我地之琳瑯今日東南乃他鄉之竹箭又此夜乘槎之客猶對仙家坐菊之賓尚臨清賞既而依稀舊識歡吳鄭之班荆樂莫新交申孔程之傾蓋向時朱夏俄涉素秋金風生而

景物清白露下而光陰晚庭前柳葉纔聽蟬鳴野外蘆  
花行看鷗上數人之内幾度琴樽百年之中少時風月  
蘭亭有昔時之會竹林無今日之歡丈夫不縱志於生  
平何屈節於名利人之情矣豈曰不然人賦一言各申  
其志使夫千載之下四海之中後之視今知我咏懷抱  
於茲日

春日孫學士宅宴序

若夫懷放曠寥廓之心非江山不能宣其氣負鬱快不平之思非琴酒不能洩其情則林泉為進退之場樽壘是言談之地白衣送酒青陽在節鳬鴈亂而江湖春梅柳開而庭院晚楚屈平之瞻望放子何之王仲宣之登臨魂兮往矣俠客時有且傾鸚鵡之杯文人代興聊舉麒麟之筆人采一字四韻成篇



與員四等宴序

自嵇阮寂寥尹班超忽高筵不嗣中宵誰賞古今惜芳  
辰者停鶴軫于風衢懷幽契者佇鸞觴於月徑已矣哉  
林壑遂喪煙霞少對良會不恒神交復幾請沃非常之  
思但宣絕代之遊託同志於百齡求知已於千載道之  
存矣無乃然乎人賦一言俱裁四韻



夏日諸公見尋訪詩序

天地不仁造化無力授僕以幽憂孤憤之性稟僕以耿  
介不平之氣頓忘山岳坎坷於唐堯之朝傲想煙霞顯  
賴於聖明之代情可知矣賴乎神交勝友得山澤之蚪  
龍隱路幽居降雲霄之鸞鳳楊公沈公行之者仁義禮  
智用之者乾元亨利立經苦而白鳳翔素牒開而紫鱗  
降金門待詔謁天子於朝廷石室尋真訪下走於丘壑  
幽人待士非無北轡之書隱士迎賓自有西山之饌席

門蓬巷佇高士之來遊叢桂幽蘭喜王孫之相對山南  
花圃澗北松林黃雀至而清風生白鶴飛而蒼雲起停  
琴綠水仲長統之歡娛置酒青山郭子期之賓客人探  
一字四韻成篇

仲氏宅宴序

僕不幸在流俗而嗜煙霞恨林泉不比德而嵇阮不同  
時處良辰而鬱快仰高風而杼軸者多矣豈夫司馬卿  
之車騎上客盈門仲長統之園林羣英在席坐卧南郭  
蕭條東野江波浩曠晴山紛積嘉鴛鸞之接翼曜江漢  
之多才顧斜景而危心瞻火雲而變色思傳勝饒敢振  
文鋒蓋同席者高人薛曜等耳蓋各賦詩放懷敘志俾  
山川獲申於知己煙霞受制於吾徒也



江寧吳少府宅餞宴序

蔣山南望長江北流伍胥用而三吳盛孫權困而九州  
裂遺墟舊壤數萬里之皇城虎踞龍盤三百年之帝國  
闕連石塞地實金陵霸氣盡而江山空皇風清而市朝  
改昔時地險嘗為建業之雄都今日太平即是江寧之  
小邑吳生俊宋輔佐烹鮮我輩良游方馳去鷄梁伯鸞  
之遠逝自有長謠閔仲叔之遐征仍逢厚禮臨別浦枕  
離亭陣雲四面洪濤千里簾帷後闌竹樹映而秋煙生

棟宇前臨波潮驚而祥風動嗣宗高嘯綠軫方調文舉  
清談芳樽自滿想衣冠於舊國便值三秋憶風景於新  
亭俄傷萬古情窮興洽樂極悲來愴零雨於中軒動流  
波於下席嗟乎九江為別帝里隔於雲端五嶺方踰交  
州在於天際方嚴去舳且對窮途玉露下而蒼山空他  
鄉悲而故人別請開文囿共瀉詞源人賦一言俱題四  
韻

還冀州別洛下知己序

東西南北某也何從寒暑陰陽時哉不與河陽古樹無  
復殘花合浦寒煙空驚墜葉王生賣藥入天子之中都  
夏統乘舟屬羣公之大會風煙匝地駿馬如龍鐘鼓沸  
天美人似玉芳筵交映旁徵豹象之胎華饌重開直報  
蛟龍之髓李鷹之思吳命駕果為秋風伯鸞之適越登  
山以求淶水辭故友謝時人登鄂坂而迂迴入邛山而  
北走何年風月三山滄海之春何處風花一曲青溪之

路賓鴻逐暖孤飛萬里之中仙鶴隨雲直去千年之後  
悲夫光陰難再子卿殷勤於少卿風景不殊趙北相望  
於洛北鴛鴦雅什俱為贈別之資鸚鵡奇杯共盡忘憂  
之酒

春夜桑泉別王少府序

下官以窮途萬里動脂轄以長驅王公以傾餞百壺別  
芳筵而促興是以青陽半序明月中霄離亭擁花草之  
芳別館積琴歌之思去留歡盡動息悲來惜投分之幾  
何恨知音之忽間他鄉握手自傷關塞之春異縣分襟  
竟切悽愴之路既而星河漸落煙霧仍開高林靜而霜  
鳥飛長路曉而征驂動含情不拜空佇聽於南昌揮涕  
無言請投文於西候因採一字四韻成篇

王子安集卷六

王子安集卷七

唐 王勃 撰


序

秋日楚州郝司戶宅餞崔使君序

上元二載高旻八月人多汴北地實淮南海氣近而蒼  
山陰天光秋而白雲晚川塗所亘郢路極於峭瀾風壤  
所交荆門泊於吳越憑勝地列雄州城池當要害之衝  
寮采盡鷁鸞之選昌亭旅食悲下走之窮愁山曲淹留

屬羣公之宴喜披鶴霧陟龍門故人握手新知滿目飲  
崔公之盛德果遇攀輪慕郝氏之高風還逢解榻接衣  
簪於座右駐旌旆於城隅臨風雲而解帶眄江山以揮  
涕巖楹左峙俯映玄潭野徑斜開傍連翠渚青蘋布葉  
亂荷芰而動秋風朱草垂榮雜芝蘭而涵晚液艤仙舟  
於石岬薦綺席於沙場賓友盛而芳罇滿林塘青而上  
筵肅琴歌迭起俎豆駢羅煙霞充耳目之翫魚鳥盡江  
湖之賞情繁樂極日暮途遙思染翰以凌雲願麾戈以

畱景嗟乎素交為重覺老幼之同歸朱紱儻來豈榮枯  
之足道且欣風物共悅濠梁齊天地於一指混飛沉於  
一貫嗟乎此歡難再慙慙北海之筵相見何時惆悵南  
溟之路請揚文筆共記良遊人賦一言俱成四韻公爾



秋晚入洛於畢公宅別道王宴序

下官才不曠俗識不動時充皇王之萬姓預乾坤之一  
物早師周禮偶愛儒宗晚讀老莊動諧真性進非干物  
自疎朝市之機退不邀榮誰識王侯之貴散琴樽於北  
阜喜耕鑿於東陂野老披荷暫辭幽澗山人賣藥忽至  
神州驚帝室之威靈偉皇居之壯麗朝遊魏闕見軒冕  
於南宮暮宿靈臺聞絃歌於北里交情獨放已厭人間  
野性時違少留都下道王以天孫之重分曲阜之新基

畢公以帝室之華擁平陽之舊館迹塵鐘鼎思在江湖  
居榮命於中朝接風期於下走綠縢朱紱且混以蘿裳  
列榭崇軒坐均於蓬戶賓主繇其莫辨語默於是同歸  
維賢王之樂善備將軍之揖客是日也雲繁雨驟氣爽  
風馳高秋九月王畿千里高局向術似元禮之龍門甲  
第臨衢有當時之驛騎英王入座牢醴還陳高士臨筵  
樵蘇不爨是非雙遣自然天地之間榮賤兩忘何必山  
林之下玄談清論泉石縱橫雄筆壯詞煙霞照灼既而

神馳象外宴洽寰中白露下而南亭虛蒼煙生而北林  
晚鷄鷓始望不及牲牢麋鹿長懷非忘林藪先生負局  
倦城市之塵埃遊子橫琴憶汀洲之杜若况乎迹不皆  
遂時不再來屬宸駕之方旋值羣公之畢從洛城風景  
此會無期戚里笙竽浮驩易盡仰雲霞而道意捨塵事  
而論心夏仲御之浮舟願乘春水張季鷹之命駕思動  
秋風策藜杖而非遙勅柴車之有日青溪數曲幽人長  
往白雲萬里帝鄉難見安貞抱朴已甘心於下走全忠

履道是所望於羣公倘心迹克諧去畱咸遂廟堂多暇  
返身滄海之隅軒冕長辭迴首箕山之路尋赤松而見  
及泛黃菊以相從雖源水桃花時時失路而幽山桂樹  
往往逢人庶公子之來遊幸王孫之畢至茅君待客自  
有金壇王烈迎賓還開石架惟恐一丘風月侶山水而  
忘年三徑蓬蒿待公卿之來日對光陰之易晚惜雲霧  
之難披羣公葉縣鳧飛入朝廷而不出下走遼州鶴去  
謝城闕而依然敢抒重襟爰疏短引式命離前之筆希

存別後之資凡我故人其辭云爾



越州永興李明府宅送蕭三還齊州序

嗟乎不遊天下者安知四海之交不涉河梁者豈識別  
離之恨薜衣松杖琴罇為得意之親臨遠登高煙霞是  
賞心之事有梁孝王之下客僕是南河之南孟嘗君之  
上賓予在北山之北幸屬一人作寰中之主翛然四皓  
為方外之臣俱遊萬物之間相遇三江之表許玄度之  
清風朗月時慰相思王逸少之修竹茂林屢陪歡宴加  
以惠而好我攜手同行或登吳會而聽越吟或下宛委

而觀禹穴良談落落金石絲竹之音徽雅智飄飄松柏  
風雲之氣狀當此時也嘗謂連壁無異鄉之別斷金有  
好親之契生平於張范之年齊物於惠莊之歲三光迴  
薄未殫投分之情四序循環詎盡忘言之道豈期我畱  
子往樂去悲來橫咽水而東西緒愁雲於南北况乎泣  
窮途於白首白首非臨別之秋嗟岐路於他鄉他鄉豈  
送歸之地萼收戒序少昊司辰清風起而城闕寒白露  
下而江山遠徘徊去鶴將別益而同飛斷續來鴻共離

舟而俱泛古人道別動便經年今我言離會當何日山  
巨源之風猷令望善佐朝廷嵇叔夜之潦倒麤疎甘從  
草澤行當山中攀桂往往思仁野外紉蘭時時佩德人  
非桃李豈得無言子是簫韶當須振響勉酌傷離之酒  
具陳感別之辭各賦一言俱題六韻



秋夜於綿州羣官席別薛昇華序

夫神明所貴者道也天地所寶者才也故雖陰陽同功  
宇宙戮力山川崩騰以作氣星象磊落以降精終不能  
五百年而生兩賢也故曰才難不其然乎今之羣公並  
受奇彩各仗異氣或江海其量或林泉其識或簪裾其  
跡或雲漢其志不可雙得也今並集此矣豈英靈之道  
長而造化之功倍乎僕之區區常以為人之百年猶如  
一瞬非不知風月不足懷也琴樽不足戀也事有切而

未能忘情有深而未能遣故僕射羣公相知非不深也  
相期非不厚也然義有四海之重而無同方之感分有  
一面之深而非累葉之契故與夫昇華者其異乎嗟乎  
積潘楊之遠好同河汾之靈液自置良友相依窮路是  
月秋也于時夕也他鄉怨而白露寒故人去而青山迴  
不其悲乎蓋各賦詩云爾

秋日餞別序

黯然別之銷魂悲哉秋之為氣入之情也傷如之何極  
野蒼茫白露涼風之八月窮途蕭瑟青山白雲之萬里  
奏鳴琴則離鵑別鶴驚岐路之悲心來勝地則時雨涼  
風助他鄉之旅思琴書人物冀部關西去馬歸軒雲間  
日下楊學士天璞自然地靈無對二十八宿稟太微之  
一星六十四爻受乾坤之兩卦論其器宇滄海添江漢  
之波序其文章玄圃積煙霞之氣幾神之外猶是卿雲

陶鑄之餘尚同嵇阮接光儀於促席直覩明月生天響  
詞辯於中筵但覺清風滿室悠哉天地含靈有喜愠之  
容集也東西悵望積別離之恨煙霞直視蛇龍去而泉  
石空文酒求朋賢俊散而琴歌斷門生餞別如北海之  
郡前高士將歸似東都之門外研精麝墨運思龍章希  
存宿昔之資去啟相思之詠

冬日羈游汾陰送韋少府入洛序

游汾勝壤樓船高漢帝之詞卜洛名都城邑辯周公之  
跡仰天文而窺日月雖共光華憑地理而考山川即殊  
南北韋少府玉山四照珠胎一色縱橫振鋒穎之才吐  
納積江湖之量子雲筆札擁鸞鳳於行間孫楚文詞列  
宮商於調下牽絲一命披林野而隨班考績三年指蘭  
臺而赴選移征駕背長亭地隔風煙人離歲月寒原冠  
蓋既同斟桂之歡岐路風塵即斷驚蓬之思下官詩書

拓落羽翮摧頽朝廷無立錐之處丘園有括囊之所山  
中事業暫到漁樵天下棲遲少留城闕忽逢萍水對雲  
雨以無聊倍切窮途撫形骸而何託于時冰霜裂地星  
象迴天朔風動而關塞寒明月下而樓臺曙各題一字  
傳之兩鄉云爾

餞宇文明序

昔者王烈登山林泉動色嵇康入座左右生光豈非仙  
表足以感神真姿可以錯物况我巨山之稟孤出昇華  
之麗清峙羣公之好善下官之惡俗接霓裳於勝席陪  
鶴轡於中軒俱拔出塵之標各仗專門之氣煙霞用足  
江海情多言泉共秋水同流詞峰與夏雲爭長雖揚庭  
載酒方趨好事之游而肆樂含毫請命昇遷之筆同抽  
藻思共寫離懷



感興奉送王少府序

八十有遇共太公晚宦未遲七歲神童與顏回蚤死何  
益僕一代丈夫四海男子衫襟緩帶擬貯鳴琴衣袖闊  
裁用安書卷貧窮無有種富貴不選人高樹易來風幽  
松難見日羽翼未備獨居草澤之間翅翮若齊即在雲  
霄之上鳥衆多而無辯鳳馬羣雜而不分龍荆山看荆  
足之夫湘水聞離騷之客人貧材富罔窺卿相之門貌  
弱骨剛豈入王侯之宅王少府北辭伊闕南登湏山過

我貧居飲我清酒一談經史亞比孔先生再讀詞章何  
如曹子建山岳藏其跡川澤隱其形一旦覩風雲千年  
想光景孔夫子何須頻刪其詩書焉知來者不如今鄭  
康成何須浪注其經史豈覺今之不如古王少府乃可  
畏後生學問人也各為四韻共寫別懷

別盧主簿序

林慮主簿清靈士也達于藝明乎道詮柱下之理駁河  
上之義撮其綱統成其卷軸吾儕服其精博時議稱其  
典要可謂賢人師古老氏不死矣夫靈芝既秀蘭蕙同  
薰仙鳳于飛鵷鸞舞翼何則物類之相感也況乎同得  
此義目擊道存此僕所以望風投款披襟請益展轉於  
寤寐殷勤于左右詩不云乎中心藏之何日忘之然變  
動之不居乃聚散之恒理琴樽暫離山川有別惟高明

捧檄屬吾人之解帶王事靡盬良時易失盍陳雅志各  
叙幽懷人賦一言同疏四韻云爾

送李十五序

夫人生百齡促膝是忘言之契丈夫四海交頤非贈別之資然乃想山川之遽違送歸將遠惜歲華之不待行樂無時於是輟離驂以少畱敞幽亭之多暇山芳襲吹疑居蘭室之中水樹含香宛似楓江之上御溝新溜近入離絃賓館餘花遙催別酒既而滎波東注灞岍南登浮蟻傾而高宴終跋烏落而離宮散雖相思為贈終結想於華滋而素賞無睽盍申情於麗藻人為四韻各賦

一篇

英華此篇凡再見一稱王勃送李十五序一稱駱賓王餞李八騎曹序今兩存之以俟知者

送白七序

天地所以間南北山川所以別風雲陽舒陰慘覺造化之為勞日運星迴恨良辰之不定白七官天台傑氣地乳竒精當益友之龍頭處通侯之鷺領靈珠耀掌是琴酒之文人長劍橫腰即風雲之烈士屬天象掩峻帝道徵竒吐詞場之珠玉作朝廷之鸞鳳寰中握手得希代之英靈天下傾心盡當年之意氣整秋駕駐春裝背橫溪之七曲對長亭之十里中情易感下調多愁送君當

東陸之前逢我在北風之別嗟乎良友不追神交已遠  
同人者少方見阮籍之眼青知我者稀不學馮唐之首  
白唯當遠游絕壑旅思空山幽桂一叢賞古人之明月  
長松百尺對君子之清風既而花鳥爭飛煙霞競集青  
山高而望遠白雲深而路遙貴余以道誰能柱後五千  
言贈子以言空有離前四十韻

送劼弟赴太學序

今之游太學者多矣咸一切欲速百端進取故夫膚受  
末學者因利乘便經明行修者華存實喪至於振骨鯁  
之風標服賢聖之言懷遠大之舉益有之矣未之見也  
可以深慕哉且吾家以儒輔仁述作存者八代矣未有  
不久於其道而求苟出者也故能立經陳訓刪書定禮  
揚魁梧之風樹清白之業使吾徒子孫有所取也大雅  
不云無念爾祖易不云幹父之蠱書不云惟孝友于詩

不云不如友生四者備矣加之執德弘信道篤心則口  
誦廢食忘寢渙然有所成望然有所伏然後可以託教  
義編人倫彰風聲議出處若意不感慨行不卓絕輕進  
苟動見利忘義雖上一階履半級何足恃哉終見棄於  
高人但自溺於下流矣吾被服家業霑濡庭訓切磋琢  
磨戰兢惕勵者二十餘載矣幸以薄伎獲蠲戎役嘗恥  
道未成而受祿恨不得如古君子四十強仕也而房族  
多孤飢粥不繼逼父兄之命覩飢寒之切解巾捧檄扶

老携幼今既至於斯矣不蠶而衣不耕而食吾何德以當哉至於竭小人之心中猶子之道飲食衣服晨昏左右庶幾乎令汝無反顧憂也行矣自愛游必有方離別咫尺未足耿耿嗟乎不有居者誰展色養之心不有行者孰就揚名之業籩豆有踐菽水盡心盡各賦詩叙離道意云爾

王子安集卷七

王子安集卷八

唐王勃撰

表

上九成宮頌表

臣勃言臣聞帝機無朕道洽則時邕靈化不言功成則  
頌顯伏惟陛下體元纂極模神建隧棟梁三氣庭階六  
合松軒夜警香冥姑射之心茅殿晨凝寥廓峒山之駕  
臣霑風太上庇影華胥仰衢室而無階候裏城而有地

雖望卑平叔空勤景福之詞而文謝子雲願竭甘泉之  
思謹憑天造輒貢九成宮頌二十四章攀紫墀而絕望  
叫丹闕而累息臣誠惶誠恐死罪死罪謹言

上拜南郊頌表

臣伏見總章元年十二月四日詔既清東寇將覲南岳  
甫資元勲旋窺大典伏惟皇帝陛下黼藻神器銜策睿  
圖用天老之前機戮防風之後至為而不恃懸寶位於  
中宸卑以自居託靈符於上帝禮凝蒼壁瑞溢玄圭紫  
旻降祐黃祇叶矩微臣學不照古才不曠時窺宇宙之  
神功覩郊禋之盛節時非苟邁懷雅頌而知歸道不虛  
行想謳歌而有志豈與夫周傳考室裁稱棟宇之規漢

奏甘泉未息嬉遊之諷比興衰於列代較馳驟於同衢  
而已謹憑天則輒貢拜南郊頌十章文不足奇意有遺  
美臣誠惶誠恐謹言

為原州趙長史請為公父度人表

臣某言臣聞奉忠履義帝業所資昭德報功王風是切  
臣公父故臣使持節都督豐州諸軍事豐州刺史上柱  
國南康郡王士達往因隋季預奉皇初于時元洛未清  
雙嶠尚梗江淮海岳王公數十公父身羈偽鄭寵極戎  
庭掃千載之風雲擁三河之士馬情思奉順義不圖生  
綿越寇塲密歸誠欵登太行而耀甲則建德離心出函  
谷而揚麾則王充破膽天書屢降手勅仍存洎乎九服

又安四方無事謀臣出鎮猛將臨邊西窮赤水之源東  
究青丘之境橫戈北塞盡沙漠之風塵授鉞南荒被牂  
牁之矢石義形夷險迹遍疆場分閭淹榮懸車遂禮雖  
死於牖下實懷天子之恩力盡方隅無媿忠臣之節今  
者歸藏有日先遠戒期陛下德被游魂惠流枯骨高班  
厚祿已極於生前列鼓鳴簫復光於身後誠非毀滅所  
能投報但臣霜露之感瞻彼岍而神銷烏鳥之誠俯寒  
泉而思咽希開淨福庶補窮埏伏惟陛下恢不次之恩

錄無涯之請使獲從朝例賜許度人濟沉識於昏塗拯  
亾靈於毀宅則陛下乾坤之施既不隔於幽明微臣螻  
蟻之心豈忘情於家國是所圖也非敢望也輕黷寬旒  
若墜氷谷



啟

上從舅侍郎啟

勃啟一昨弟勛至奉命以憲臺詩十首垂示氣橫霜暑  
彩洞雲局繡衣兼藻肆之華白簡控玄機之奧仙驄在  
馭踐文路而驅神冠獬下臨望詞林而直指勃質惟茅  
艾名隔縉紳虛霑自出之榮每媿諸甥之列恩華曲被  
誨誘傍臨識謝知音榮深覩典虞韶忽奏聽律呂而忘  
疲楚匣遙開仰光茫而不暇昔孔融之逢元禮罕睹高

文王祭之謁伯喈終慚懿戚援今企古議德疇恩荷慄  
兼儲悲欣兩集但才非酷似攀宅相而多慚慕切如存  
臨渭陽而增感不勝荷戴屏營之至

上武侍極啟

勃啟勃聞玄螭掩耀光銷赤堇之芒白鶴摧輝影滅青  
胡之寶繇是紫霄氣耿指牛漢而忘歸丹水神迷道驪  
泉而罔悔其有龍文已遠輕圖剗兕之功魚目濫持自  
疑靈蛇之色循榮覽分朝聞夕可君侯締華椒閣席寵  
芝局粲貂冕於金軒藻龜章於玉署月開鸞鏡懷精鑑  
以分形霜湛虬鍾蘊希聲而待物吞九溟於筆海若控  
牛溲抗五岳於詞峯如臨蟻垤馳魂霧谷忻逢紫岫之

英驛思霞丘佇接青田之響勃北巖曲藝東臯下節攀  
翰苑而思齊儔文風而立至迹疲千里未陪丹轂之遊  
葉契三英尚隔黃衣之夢謹憑洪貸輒錄舊文輕敢上  
呈列之如右涓波有託望日谷以馳誠鐘鼓無施伏雷  
門而假息謹啟

又

勃啟一昨不緣媒紹輕承盼飾祇寵相驚俯仰無地何  
則循方極弊尚虧風雨之間撫翼濡鱗猶失江湖之上  
況乎九天鵬術一代龍門榮枯舛致山川在目而可以  
追騰白日忘言於咫尺之書干突青雲投跡於尋常之  
境徒以北林增秀弱翰知歸東壑流謙纖緒未已神交  
道合君侯昭片善之榮千載一時下走得長鳴之所是  
用謬憑高獎曲撰蕪音游海無際過雷自警雖黃金激

憤指秦路而方窮蒼壁慚恩伏焦原而未遠謹啟

上李常伯啟

勃啟勃聞杞林騰秀羽族知歸暘谷流謙波臣有託然  
則朝光八聖尚欣牧豎之詞道濟五殘未隔與人之誦  
謹憑斯義輒呈宸遊東岳頌一首當仁不讓下走無慚  
於自媒聞善若驚明公豈難於知我龍門高遠眇黃道  
而無階爵里既投呌丹閭而有地伏願整停左右曲流  
國士之恩廣進芻蕘俯息樵夫之議輕陳徑捷退用彷徨



上皇甫常伯啟

勃啟一昨奉命令寫新對臺策及前後舊文謹憑國士之恩敢進與人之頌竊以龍鑣就路駑駘相懸鵲鏡臨春妍媸自遠亦有飛霜匝地蘭蕭銜共盡之悲列火埋岡玉石抱俱焚之慘然則知音罕嗣流水空存至寶不同荆山有淚君侯飾揚芻議提獎蕪詞白圭成再見之榮黃金定一言之重鵬鷖既接仰雲逕而將趨龍阪可登指星臺而有望循襟佩德撫事知恩山岳有輕河漢

無極謹啟

又

勃啟自恭陳薄技祇奉話言咳唾成恩盼睞為飾征夫  
擊節方思孤竹之風壯士寒心實有長楊之作謹憑嚴  
命輕呈乾元殿頌一首將冀導江至海常以筆札見知  
南館西園遂與簪纓為伍德雖無盡攀驥尾而方遙生  
也有涯比鴻毛而非重謹啟

--	--	--	--	--	--	--	--

上吏部裴侍郎啟

勃啟猥承衡鏡驟照堦墀本慚刀筆之工虛荷雕蟲之  
睠殊恩屢及嚴命頻加賁光耀於昏冥課官商於寂寞  
進退惟谷憂喜聚門誠恐下官冒輕進之譏使君侯招  
過聽之議貴賤交失恩愛兩虧所以戰懼盈旬遲迴改  
朔懷鄭璞而增愧捧燕珉而自恥勃性惟慵昧識謝沉  
寔蒙父兄訓導之恩藉朋友琢磨之義好學近乎智力  
行近乎仁知忠孝為九德之源故造次必於是審名利

為五常之賊故顛沛而思遠雖未之逮也亦有其志焉  
孔子曰言及之而不言謂之隱今者接君侯者三矣承  
招延者再矣抑亦可以言乎夫文章之道自古稱難聖  
人以開物成務君子以立言見志遺雅背訓孟子不為  
勸百諷一揚雄所恥苟非可以甄明大義矯正末流俗  
化資以興衰家國繇其輕重古人未嘗留心也自微言  
既絕斯文不振屈守導澆源於前枚馬張淫風於後談  
人主者以宮室苑囿為雄叙名流者以沉酗驕奢為達

故魏文用之而中國衰宋武貴之而江東亂雖沈謝爭  
驚適先兆齊梁之危徐庾竝馳不能免周陳之禍於是  
識其道者卷舌而不言明其弊者拂衣而徑逝潛夫昌  
言之論作之而有逆於時周公孔氏之教存之而不行  
於代天下之文靡不壞矣國家應千載之期恢百王之  
業天地靜默陰陽順序方欲激揚正道大庇生人黜非  
聖之書除不稽之論牧童頓顙思進皇謀樵夫拭目願  
談王道崇大厦者非一木之材匡敝俗者非一日之衛

衆持則力盡真長則偽銷自然之數也君侯受朝廷之  
寄掌鎔範之權至於舞詠澆淳好尚邪正宜深以為念  
也伏見銓擢之次每以詩賦為先誠恐君侯器人於翰  
墨之間求材於簡牘之際果未足以採取英秀斟酌高  
賢者也徒使駿骨長朽真龍不降銜才飾智者奔馳於  
末流懷真蘊璞者栖遑於下列易不云乎言行君子之  
所以動天地失之毫釐差以千里書不云乎敝化奢麗  
萬世同流餘風未殄公其念哉嗟乎蓋有識天人之幽

致明國家之大體辨焉而不窮酌焉而不竭抱膝無悶  
盱衡自得彼悠悠小技焉足為君侯道矣自非奉閒宴  
接清談未可一二言也然竊不自揆嘗著文章非敢自  
媒聊以恭命謹錄古君臣讚十篇并序雖不足塵高識  
之門亦可以見小人之志也伏願暫停左右少察胸襟  
觀述作之所存知用心之有地謹啟



上明員外啟

勃啟側聞金烏聳轡俯圓燧而抽光瑤兔浮輪候方諸  
而吐液斯則洪纖異數冥符造化之津高下相懸精契  
陶鈞之表故知聲同義合存長幼於三州理隔氣殊置  
山川於一面神交可託風雲於杵臼之間道不虛行涇  
渭於簪裾之列其有跡申知己投爵里於思齊事迫當  
仁抱龍泉而願割雖荆山已峻多輕抵鵲之珍而渤澥  
方春敢進歸鳧之景伏惟丈人珠躔降德銑社抽英河

岳縱其神器煙霞發其符采江東第一家傳正始之音  
日下無雙譽重名流之首三冬文史先兆跡於青衿百  
里絃歌即馳芳於墨綬彭澤陶潛之菊勝氣仍存河陽  
潘岳之花芳風遂遠榮加從袂上清蘭府之遊寵奪攀  
輪更掌蓬山之務麟圖緝謚定榮辱於三泉鵷閣裁書  
考薰蕕於四部既鶴鳴雲路望偃朝端鴻漸星臺俯諧  
僉議廉平譽號李宣伯之當官雅操繩時山巨源之稱  
職加以文場武庫發揮廊廟之師瓊樹瑤林寥廓風塵

之表一丘一壑同阮籍於西山一嘯一歌列嵇康於北  
面詞條鬱霧遙騰駕日之陰辨鈐橫霜直上衝星之氣  
鳬鐘蓄韻聞片言而指掌鸞鏡懸心見一善而明目情  
源九派士流欣滿腹之期德宇千門詞人有庇身之望  
方當坐談帝席雄視羣公豈徒比迹天府雌郎官而  
已哉勃崇徽啟緒盛德在家承太子之仙宗沂將軍之  
遠系朱輪在漢列高士於三台青蓋浮江扈平王於七  
姓遺風舊烈尚存清白之基祖德家聲代有縱橫之目

及金陵東覆玉馬西奔髦頭傑起文儒繼出鳳鳴朝日  
森梢煙雨之標龍躍雲津盤礴江山之氣雖雄名雅譽  
隨朔野而揚聲而華寃雕軒北南風而不競陳太丘之  
積善羔鴈成羣謝車騎之餘芳蘭蓀不替趨庭洽訓共  
歌朱萼之篇避席承歡猶守青箱之業嘗謂酣神北阜  
藉春渚而忘歸動影南樞坐秋山而長往不意蘭皋獨  
嘯輕交委鶴之書芝澗行謠坐辱飛龍之使年殊賈誼  
仰宣室而方同業謝劉繇俯長途而遂慙塞上浮雲之

跡空倦吳山隨侯明月之珠終悲暗室豈不知拂衣長  
謝林泉多倨俗之因安枕有餘廟堂非養高之所松楸  
坐月臨黛壑而遐征桂席攀風俯青嶠而自足而欲俛  
首屈膝逡巡多士之林弔影慚魂骯髒文昌之府徒以  
牛蹄已倦臨文壑而驤鱗羊角可逢想高衢而撫翼參  
名國士方叨智伯之恩揮迹奉常冀雪公孫之恥識正  
平於處士雖在孔融期仲容於望外終資許允猶恐先  
馳折翮頻驚鵠路之風再舉枯鱗空擊龍門之水丈人

借以顏色資以恩波垂雅契於長年叙情交於累代情  
加倒屣知步頃之生光禮極升堂覺聲名之有地是用  
俯抽丹思上瀆清顏鏤殊獎於肝膽銜德音於咳唾懦  
夫增氣先歌易水之風壯士投心思赴吳宮之火恩崇  
命淺瞻呂梁而可泛山高海深涉孟門而何險謹啟

上許左丞啟

勃啟自遠阻恩華嬰纏風恙守愚空谷斂跡仙臺同衛  
玠之虛羸談非正始愧劉楨之逸氣臥似漳濱朝野既  
殊風猷遂隔望芝蘭之漸遠覺鄙悵之都生所以暫下  
松丘言游洛邑永懷前倦逡巡元禮之門延首下風匍  
匐文章之府實願稍捐人事少奉清言質儒釋之幽疑  
訪空玄之極境願聞者道敢披江海之心祈進者榮非  
慕軒裳之重雖齒絕位殊空塵左右而道存目擊豈隔

形體輕陟階堂伏深悸越謹啟

上郎都督啟

勃啟勃聞古之君子重神交而貴道合者以其得披心  
胸而盡志義也是以叔牙苟在管仲分多而不貪無知  
尚存陳平受謗而非罪何則達其趣者能申其迹收其  
大者能讓其細也今勃東鄙之一書生耳少懷耿亮頗  
慕高烈俛仰相得則屠博可遊造次不諧則軒冕異路  
蒙君侯國士之遇受君侯長者之禮繾綣談譔殷勤誨  
誘今有情而不告是不盡也有窘而不託是有疑也將

恐季布無侶於後葉孫臏獨稱於前古嗟乎可以竭誠  
矣敢不盡言乎勃家大人天下獨行者也性惡儲斂家  
無擔石自延國譴遠宰邊隅常願全雅志於暮齒揚素  
風於下邑而道里遙資糧窘鮮秩寡鍾釜債盈數萬  
此勃所以側目扼腕臨深履薄庶逢知己之厚以成大  
人之峻節也古人有言富觀其所與貧觀其所取又曰  
損有餘補不足於君侯何如哉然則定其交而後求敢  
無愧已易其心而後語夫何飾讓賑給之義既惟其常

厚薄之差伏希俯訪輕塵視聽倍增兢惕

王子安集卷八

謹案卷六第四頁前五行無慚於景燭云爾刊本  
燭作躅據文苑英華改

第五頁後二行僉為文在我卜翰苑當仁十字內  
疑有訛脫

第六頁前五行黃雀度而颺驚刊本雀作鵲檢風  
土記仲夏風名黃雀風今據改

第九頁前一行春日孫學士宅宴序刊本脫士字  
據文苑英華目錄增

第十三頁後二行想衣冠于舊國句下刊本脫去

十八字據文苑英華補

卷七第三頁後二行綠滕朱紱刊本滕作縑據文苑英華改

第四頁前七行策藜杖而非遙刊本杖訛杖今改  
第六頁後一行金石絲竹之音徽刊本徽訛輝今  
改

卷八第十五頁後二行森梢煙雨之標刊本梢訛

峭據文苑英華改





總校官庶吉士臣侍朝

校對官編修臣沈清藻

膳錄監生臣蕭準

膳錄監生臣馮國柄